

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**VLADA**

**-NACRT-**

**ZAKON**  
**o izmjenama i dopunama Zakona o srednjem obrazovanju i odgoju**

**Tuzla, decembar 2024. godine**

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“ broj: 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj \_\_\_\_\_ godine, d o n o s i

## **Z A K O N**

### **O IZMJENAMA I DOPUNAMA ZAKONA O SREDNJEM OBRAZOVANJU I ODGOJU**

#### **Član 1.**

U Zakonu o srednjem obrazovanju i odgoju - prečišćeni tekst („Službene novine Tuzlanskog kantona“, br. 10/20, 11/20, 8/21, 11/21, 22/21, 5/22, 10/22, 11/22, 9/23 i 12/23) u članu 24. iza stava (5) dodaje se novi stav (6) koji glasi:

„(6) Škola čiji je osnivač Skupština Kantona ima zvaničnu internet stranicu i e-mail adresu, koje je dužna redovno ažurirati i pratiti.“.

#### **Član 2.**

U članu 35. u stavu (1) iza riječi „propisima“ dodaju se riječi „a naročito u pogledu zapošljavanja nastavnog, stručnog i drugog kadra, te slobode rada nastavnika i stručnih saradnika“.

#### **Član 3.**

Iza člana 35. dodaje se novi član 35a. koji glasi:

##### **„Član 35a.**

##### **(Simboli i obilježja Bosne i Hercegovine)**

(1) U školama je obavezno isticanje simbola i intoniranje himne Bosne i Hercegovine, u skladu sa propisom koji donosi ministar.

(2) Nakon intoniranja himne u školama čiji je osnivač Skupština Kantona intonirat će se i svečana pjesma koju će putem javnog konkursa odabrati Ministarstvo u skladu sa propisom iz stava (1) ovog člana.“.

#### **Član 4.**

U članu 36. u naslovu člana iza riječi „aktivnosti“ dodaju se riječi „i simboli“.

Stav (2) mijenja se i glasi:

„(2) U prostorima škole zabranjeni simboli su:

a) simboli drugih država (zastave, grbovi stranih država i sl.), izuzev onih koji služe realizaciji nastavnog plana i programa i provođenju školskih aktivnosti,

b) bilo kakvi simboli, uključujući fotografije ili objekte koji se odnose na političke stranke, pokrete, lidere, vjerska i rasna obilježja, izuzev onih koji služe realizaciji nastavnog plana i programa i

c) simboli, uključujući fotografije ili objekte (spomen table, spomenici i sl.) koji se odnose na osobe ili događaje koji su presudama domaćih i međunarodnih sudova dovedeni u vezu sa ratnim zločinima izuzev onih koji služe realizaciji nastavnog plana i programa.“.

Stav (3) briše se.

Dosadašnji stav (4) postaje stav (3).

#### **Član 5.**

U članu 42. u stavu (7) riječi „značajniji datumi u školi“ zamjenjuju se riječima „obilježavanje značajnijih datuma u školi u skladu sa propisom iz stava (9) ovog člana“.

#### **Član 6.**

U članu 44. u stavu (3) u tački a) iza riječi „zagrijavanje“ dodaju se riječi „ili hlađenje“.

### **Član 7.**

U članu 46. u stavu (2) iza riječi „časova“ na kraju stava dodaju se riječi „izuzev ukoliko je realizovano više od 90% nastavnih sadržaja“.

U stavu (3) iza teksta „i/ili“ dodaju se riječi „nastavnih sadržaja odnosno“.

Stav (4) briše se.

### **Član 8.**

Član 50 mijenja se i glasi:

#### **„Član 50.**

#### **(Izlet, stručna posjeta, stručna ekskurzija, ekskurzija, logorovanje, razmjena učenika, studijska posjeta i druge aktivnosti)**

(1) Škola organizuje izlete, stručne posjete, stručne ekskurzije, ekskurzije i logorovanja, u skladu sa godišnjim programom rada i bližim propisom o planiranju i organizovanju izleta, ekskurzija i logorovanja koji donosi ministar uz konsultacije sa Pedagoškim zavodom.

(2) Izleti, stručne posjete, ekskurzije i logorovanja, koja se izvode u skladu sa propisom iz stava (1) ovog člana, a predviđena su godišnjim programom rada škole, računaju se u radne dane.

(3) Stručne posjete i stručne ekskurzije uračunavaju se u nastavne dane učenicima iz predmeta iz kojih je realizovana stručna posjeta, odnosno stručna ekskurzija.

(4) Studijske posjete, razmjene učenika, posjete školama i druge aktivnosti učenika i nastavnika izvan Bosne i Hercegovine realiziraju se uz prethodnu saglasnost Ministarstva a u skladu sa posebnim propisom koji donosi ministar.

### **Član 9.**

U članu 63. u stavu (2) iza riječi „razreda“ dodaju se riječi „i to samo ukoliko je u momentu upisa u srednju školu ispunjavao sve uslove i kriterije za upis u taj obrazovni program“.

Iza stava (2) dodaje se novi stav (3) koji glasi:

„(3) Učenik koji je prešao u drugi obrazovni program u skladu sa stavom (2) ovog člana, a naknadno se inspekcijom nadzorom utvrdi da nije ispunjavao sve uslove i kriterije za upis u taj obrazovni program, gubi pravo na dalje redovno obrazovanje u tom obrazovnom programu odnosno školi ali će mu biti omogućeno da nastavi redovno obrazovanje u obrazovnom programu odnosno školi iz koje je prvobitno prešao.“

Dosadašnji stavovi (3), (4), (5) i (6) postaju stavovi (4), (5), (6) i (7).

### **Član 10.**

U članu 64. stav (3) mijenja se i glasi:

„(3) Bliži propis o izvođenju praktične nastave donosi ministar uz konsultacije sa Pedagoškim zavodom.“

### **Član 11.**

U članu 86. u stavu (3) u tački j) broj „30“ zamjenjuje se brojem „19“.

### **Član 12.**

Iza člana 94. dodaje se novi član 94a. koji glasi:

#### **„Član 94a.**

#### **(Opći uslovi za zasnivanje radnog odnosa u školi)**

(1) Da bi zasnovalo radni odnos u školi, lice mora ispunjavati sljedeće opće uslove:

a) da je državljanin Bosne i Hercegovine;

b) da je starije od 18 godina, a mlađe od 65 godina;

c) da je zdravstveno sposobno za obavljanje poslova predviđenih za radno mjesto na kojem zasniva radni odnos;

d) da nije obuhvaćeno odredbom člana IX 1. Ustava Bosne i Hercegovine;

e) da se protiv njega ne vodi krivični postupak.

(2) Za dokazivanje ispunjavanja uslova iz stava (1) tačka c) ovog člana priznaje se samo ljekarsko uvjerenje koje izdaje ovlaštena zdravstvena ustanova.

(3) Lice kojem je ranije prestao radni odnos u skladu sa odredbama Zakona o radu („Službene novine Federacije Bosne i Hercegovine”, br. 26/16, 89/18, 23/20, 44/22 i 39/24) (u daljem tekstu: Zakon o radu), usljed navršavanja godina života odnosno godina staža osiguranja u skladu sa propisima o penzijskom i invalidskom osiguranju, može zasnovati radni odnos u školi isključivo na određeno vrijeme u skladu sa odredbama člana 101. stav (4) tačka b) i tačka c) ovog zakona.“.

### **Član 13.**

U članu 95. u stavu (1) riječi „uslova utvrđenih Zakonom o radu“ zamjenjuju se riječima „općih uslova propisanih članom 94a. ovog zakona“.

Tačka c) briše se.

Stav (5) briše se.

### **Član 14.**

U članu 101. u stavu (1) riječi „i objavljuje u dnevnom listu i“ zamjenjuju se riječima „i u skraćenom obliku (verziji) objavljuje u dnevnom listu dok se integralni tekst konkursa objavljuje“.

U stavu (2) riječi „koji se raspisuje u skladu sa opštim aktima škole“ zamjenjuju se riječima „i angažovanjem zaposlenika na određeno vrijeme radi obezbjeđenja stručne zastupljenosti nastave i obavljanja drugih neophodnih poslova, do raspisivanja konkursa, odnosno oglasa, odnosno do okončanja postupka po raspisanom konkursu, odnosno oglasu ili radi zamjene odsutnog zaposlenika škole (bolovanje, neplaćeno odsustvo, iznenadni prekid radnog odnosa), do kraja započetog polugodišta, u skladu sa uslovima, kriterijima i postupkom utvrđenim opštim aktima škole“.

U stavu (4) u tački f) riječi „radi dopune do punog radnog vremena“ zamjenjuju se riječima „dopunom radnog vremena ali ne više od punog radnog vremena“.

### **Član 15.**

U članu 101a. u stavu (1) iza riječi „neodređeno vrijeme“ dodaju se riječi „izuzev ugovora o radu zaključenih na određeno vrijeme iz stava (3) ovog člana“.

U stavu (2) tekst „(„Službene novine Federacije BiH“, br. 26/16, 89/18 i 23/20) - (u daljem tekstu: Zakon o radu)“ briše se.

### **Član 16.**

U članu 103. u stavu (1) riječi „najmanje jednom u četiri“ zamjenjuju se riječima „svake dvije“.

### **Član 17.**

U članu 111. stav (1) mijenja se i glasi:

„(1) Pripravnik je lice koje prvi puta zasniva radni odnos u školi radi stručnog osposobljavanja za samostalan rad u obrazovanju s ciljem polaganja stručnog ispita.“.

U stavu (3) riječi „a najduže godinu dana“ zamjenjuju se riječima „u trajanju od 12 mjeseci“.

### **Član 18.**

U članu 112. riječi „Ako je stručni ispit ili radno iskustvo utvrđeno zakonom ili pravilnikom o radu uslov za obavljanje poslova određenog zanimanja, škola može lice koje je završilo školovanje za takvo zanimanje“ zamjenjuje se riječima „Lice koje mora proći kroz stručno

osposobljavanje za samostalan rad u obrazovanju kako bi položilo stručni ispit može se“ tekst „(„Službene novine Federacije BiH“, br. 26/16 i 89/18)“ briše se.

#### **Član 19.**

Član 125a. briše se.

#### **Član 20.**

U članu 127. u stavu (2) iza riječi „uslova“ dodaju se riječi „propisanih članom 94a. ovog zakona“.

#### **Član 21.**

U članu 131a. u stavu (4) iza riječi „dana“ dodaju se riječi „a u slučaju da privremena spriječenost za rad traje duže od 60 dana Školski odbor ovlaštenje iz stava (1) ovog člana može produžiti za dodatnih 60 dana“.

#### **Član 22.**

Član 135a. briše se.

#### **Član 23.**

U članu 161. stav (3) mijenja se i glasi:

„(3) Škola se finansira i ostvarivanjem vlastitih javnih prihoda od iznajmljivanja i prodaje proizvoda, roba i usluga u skladu sa propisima kojima se reguliše oblast vlastitih javnih prihoda u Federaciji Bosne i Hercegovine.“.

#### **Član 24.**

U članu 163. stav (2) mijenja se i glasi:

„(2) Inspeksijski nadzor nad provođenjem ovog zakona i propisa donesenih na osnovu ovog zakona, naročito u pogledu odgojno-obrazovnog rada škole, upisa i ocjenjivanja učenika, zapošljavanja i radnih odnosa zaposlenika škole i uslova za zaključivanje ugovora o radu zaposlenika škole, rada školskih organa i tijela te stručnih organa škole, vrši nadležna inspekcija za obrazovanje.“.

#### **Član 25.**

Član 164. mijenja se i glasi:

#### **„Član 164.**

#### **(Kaznene odredbe)**

(1) Novčanom kaznom od 2.000 do 5.000 KM kazniće se za prekršaj škola, ako:

- a) postupi suprotno odredbi člana 7. stav (1) i onemogući upotrebu u nastavi bilo kojeg službenog jezika ili službenog pisma,
- b) postupi suprotno odredbi člana 7. stav (3) i vrši diskriminaciju zaposlenika i učenika zbog korišćenja bilo kojeg od službenih jezika u BiH,
- c) postupi suprotno odredbi člana 9. stav (4) i ne omogući učenicima koji ne žele pohađati nastavu iz predmeta vjeronauka da pohađaju nastavu iz predmeta istorija religija,
- d) postupi suprotno odredbi člana 19. stav (1) i otpočne sa radom prije nego što Ministarstvo utvrdi da su ispunjeni uslovi za rad,
- e) postupi suprotno odredbi člana 20. stav (2) i izda svjedodžbu ili drugu javnu ispravu o završenom razredu odnosno obrazovanju, prije upisa u Registar srednjih škola,
- f) postupi suprotno odredbi člana 22. stav (2) i organizuje obrazovno-odgojni rad izvan sjedišta škole bez saglasnosti Ministarstva
- g) ako redovno ne ažurira i ne prati veb stranicu i e-mail adresu u skladu sa članom 24. stav (6),
- h) postupi suprotno odredbi člana 32. stav (1) i vrši diskriminaciju djece u pristupu djece obrazovanju ili njihovom učešću u obrazovnom procesu,
- i) ako ne postupi u skladu sa propisom iz člana 35a. stav (1),

- j) postupi suprotno odredbi člana 36. stav (1) i omogući organizovanje i djelovanje političkih stranaka i njihovih podmladaka,
- k) ako istakne simbole u školi suprotno odredbama člana 36. stav (2),
- l) postupi suprotno odredbi člana 42. stav (8) i odstupi od školskog kalendara bez saglasnosti Ministarstva,
- m) ako ne postupa u skladu sa propisom iz člana 42. stav (9),“.
- n) postupi suprotno odredbi člana 49. stav (6),
- u) ako organizuje izlete, stručne posjete, stručne ekskurzije, ekskurzije, logorovanja ili realizuje studentske posjete, razmjene učenika, posjete školama i druge aktivnosti učenika i nastavnika izvan Bosne i Hercegovine suprotno odredbama člana 50.,
- v) postupi suprotno odredbi člana 51. stav (4) i organizuje manifestaciju koja nije utvrđena godišnjim programom rada bez saglasnosti Ministarstva,
- z) postupi suprotno odredbi člana 56. stav (2) i dozvoli upotrebu udžbenika, priručnika i drugih nastavnih sredstava koje nije odobrilo Ministarstvo,
- aa) postupi suprotno odredbi člana 63. stav (5) i ne omogući učeniku polaganje razlike predmeta do 15. aprila tekuće školske godine,
- bb) ako ne postupa u skladu sa propisom iz člana 64. stav (3),
- cc) upiše učenika suprotno odredbama člana 69. stavovi (1) do (9),
- dd) izda dokument iz člana 93. stav (3) sa netačnim podacima,
- ee) postupi suprotno odredbi člana 101. stavovi (1), (7), (8), (10), (11) i (13),
- ff) postupi suprotno odredbi člana 108. stav (1) te se utvrdi da je norma nastavnika u suprotnosti sa odredbama Pedagoških standarda i normativa,
- gg) postupi suprotno odredbi člana 114. stav (1) i ne obezbijedi redovno ocjenjivanje rada nastavnika, stručnih saradnika i saradnika,
- hh) postupi suprotno odredbama člana 115. stavovi (1) i (4),
- ii) postupi suprotno odredbama člana 129. stavovi (1), (2) ili (4),
- jj) ako ne postupi u skladu sa odredbom člana 132. stav (1) tačka n) i ne obustavi od izvršenja opšti akt školskog odbora koji je u suprotnosti sa ustavom ili zakonom kao i pojedinačni akt kojim se nanosi šteta školi ili društvenoj zajednici.

(2) Za prekršaj iz prethodnog stava kazniće se i odgovorno lice u školi novčanom kaznom od 1.000 do 2.000 KM.“.

### **Član 26.**

U članu 165. u stavu (1) riječi „od 500 do 2.000 KM“ zamjenjuju se riječima „od 1.000 do 3.000 KM“.

Iza tačke c) dodaje se nova tačka d) koja glasi:

„d) ako upiše učenika suprotno odredbi člana 63. stav (2),“.

Dosadašnje tačke d), e), f), g), h), i) i j) postaju tačke e), f), g), h), i), j) i k).

Dosadašnja tačka d) koja postaje tačka e) mijenja se i glasi:

„e) ne vrši redovno praćenje, vrednovanje i ocjenjivanje učenika na način utvrđen članom 75.,“.

Dosadašnja tačka f) koja postaje tačka g) mijenja se i glasi:

„g) postupi suprotno odredbama člana 101.,“.

U stavu (2) riječi „od 200 do 800 KM“ zamjenjuju se riječima „od 500 do 1.500 KM“.

U stavu (3) riječi „od 200 do 800 KM“ zamjenjuju se riječima „od 500 do 1.500 KM“ a riječi „49. stav (3),“ brišu se.

### **Član 27.**

#### **(Donošenje podzakonskih akata)**

(1) U roku od šest mjeseci od dana stupanja na snagu ovog zakona ministar će donijeti propis iz člana 35a. Zakona.

(2) U roku od šest mjeseci od dana stupanja na snagu ovog zakona ministar će donijeti propis iz člana 50. stav (1) Zakona.

(3) U roku od šest mjeseci od dana stupanja na snagu ovog zakona ministar će donijeti propis iz člana 50. stav (4) Zakona.

(4) U roku od šest mjeseci od dana stupanja na snagu ovog zakona ministar će donijeti propis iz člana 64. stav (3) Zakona.

(5) Do donošenja propisa iz stava (2) i stava (4) ovog člana primjenjivat će se postojeći propisi izuzev odredaba koje su u suprotnosti sa zakonom.

### **Član 28.**

#### **(Stupanje na snagu)**

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

**BOSNA I HERCEGOVINA**  
**Federacija Bosne i Hercegovine**  
**TUZLANSKI KANTON**  
**Skupština**  
**Broj:**  
**Tuzla,**

**Predsjednik**  
**Skupštine Tuzlanskog kantona**

**Žarko Vujović**

## O B R A Z L O Ž E N J E

### Nacrta Zakona o izmjenama i dopunama Zakona o srednjem obrazovanju i odgoju

#### I – PRAVNI OSNOV ZA DONOŠENJE ZAKONA

Pravni osnov za donošenje ovog Zakona sadržan je u poglavlju IV 2. član 24. c) Ustava Tuzlanskog kantona („Službene novine TPK“, broj 7/97 i 3/99 i „Službene novine TK“, broj 13/99, 10/00, 14/02, 6/04 i 10/04 ), kojim je utvrđeno da Skupština Kantona donosi zakone i ostale propise neophodne za izvršavanje nadležnosti Kantona.

#### II – RAZLOZI ZA DONOŠENJE ZAKONA

Razlozi za donošenje Zakona o izmjenama i dopunama Zakona o srednjem obrazovanju i odgoju su višestruki. Prije svega ovim zakonom se usklađuju postojeće odredbe sa zakonima koji regulišu oblast radnih odnosa ali i uvode nove odredbe kojima se vrši ujednačavanje sa ostalim oblastima koje se regulišu propisima Tuzlanskog kantona kao i usklađivanje sa odredbama propisa viših nivoa. Pored navedenog jedan od razloga je i popunjavanje pravnih praznina uočenih kroz primjenu osnovnog teksta zakona te jasnije preciziranje normi koje se odnose na radne odnose zaposlenika kako bi se postigla bolja prohodnost i omogućilo lakše ostvarivanje prava iz radnog odnosa. Jedan od razloga je svakako i jačanje uloge nadležne inspekcije za obrazovanje kroz dodatne kaznene odredbe, povećanje iznosa postojećih novčanih kazni te jasnije definisanje uloge inspekcije.

#### III – OBRAZLOŽENJE POJEDINIH RJEŠENJA

**Član 1.** vrši se dopuna postojećeg člana 24. novim stavom kojim se propisuje obaveza škola čiji je osnivač Skupština Tuzlanskog kantona na korištenje, redovno ažuriranje i praćenje internet stranica i e-mail adresa koji su im omogućene na jedinstvenoj domneni skolatk.edu.ba.

**Član 2.** vrše se izmjene postojećeg člana 35. stav (1) kako bi se preciznije definisala autonomija škole i odredba uskladila sa Zakonom o osnovnom odgoju i obrazovanju.

**Član 3.** dodaje se novi član 35a. kojim se propisuje obaveza školama isticanja simbola i obilježja Bosne i Hercegovine te intoniranja himne Bosne i Hercegovine na način koji će biti bliže regulisan posebnim propisom koji donosi ministar obrazovanja i nauke.

**Član 4.** vrši se izmjena člana 36. stav (2) kojim se reguliše koji su simboli neprihvatljivi i zabranjeni u školi obzirom da je utvrđeno da je dosadašnja norma sadržavala određene nelogičnosti koje su mogle dovesti do pogrešnog tumačenja same norme te se vrše adekvatne izmjene i pomjeranje stavova a u vezi sa navedenim.

**Član 5.** vrši se izmjena postojećeg člana 42. stav (7) kako bi se norma učinila jasnijom.

**Član 6.** vrši se dopuna postojećeg člana 44. stav (3) tačka a) kako bi se norma učinila jasnijom.

**Član 7.** vrši se dopuna u postojećem članu 46. i to u stavovima (2) i (3) koji se odnose na završetak nastavne godine i povezuje isti sa realizacijom nastavnih sadržaja u okviru godišnjeg fonda nastavnih časova i broja nastavnih dana.

**Član 8.** izmjenom člana 50. uređuju se način izvođenja izleta, stručnih posjeta, ekskurzija, logorovanja odnosno da će isti biti utvrđen propisom koji donosi ministar ali također se uvodi i obaveza pribavljanja prethodne saglasnosti ministarstva kod obavljanja drugih aktivnosti učenika i nastavnika koje se realizuju van Bosne i Hercegovine i to u skladu sa propisom koji donosi ministar.

**Član 9.** vrše se dopune člana 63. kako bi se jasnije uredila pitanja prelaska učenika u drugi obrazovni program u okviru iste ili druge škole odnosno uređuju se jasnije uslovi koje učenik mora ispuniti da bi prešao u drugi obrazovni program te postupanje ukoliko se utvdi naknadno da ti uslovi nisu ispunjeni.

**Član 10.** vrši se izmjena u članu 64. stav (3) kako bi se omogućilo uređivanje svih pitanja vezanih za praktičnu nastavu obzirom da je ranije rješenje specificiralo samo određena pitanja.



**Član 11.** vrši se izmjena člana 86. stav (3) tačka j) kako bi se omogućio isti tretman učenika u osnovnim i srednjim školama.

**Član 12.** dodaje se novi član 94a. kojim se propisuju opći uslovi za zasnivanje radnog odnosa u školi po uzoru na druge djelatnosti čiji rad se reguliše propisima Tuzlanskog kantona te utvrđuje i izuzetak za zapošljavanje lica koja su stekla uslove za penziju, odnosno da ista u školi mogu biti angažovana isključivo na određeno vrijeme i to za zamjenu odsutnog zaposlenika ili pak za izvođenje nastave do raspisivanja konkursa/oglasa ili do okončanja istih ukoliko su već raspisani, što podrazumijeva da ova lica ne mogu biti primljena u radni odnos putem konkursa/oglasa.

**Član 13.** vrši se izmjena postojećeg člana 95. a vezano za dodavanje novog člana kojim se reguliše opći uslovi za zasnivanje radnog odnosa u školi.

**Član 14.** vrše se izmjene u članu 101. kako bi se omogućila lakša i efikasnija objava konkursa/oglasa za prijem u radni odnos zaposlenika te izmjene koje jasnije i preciznije reguliše dopunu normi kao i prijem zaposlenika u školama čiji osnivač nije Skupština Tuzlanskog kantona.

**Član 15.** vrši se izmjena u članu 101a. stav (1) kako bi se norma učinila jasnijom te se briše nepotrebni tekst obzirom da je ranije izvršeno skraćivanje naziva Zakona o radu.

**Član 16.** vrši se izmjena u članu 103. stav (1) kako bi se isti uskladio sa odredbama Kolektivnog ugovora za djelatnost osnovnog obrazovanje u Tuzlanskom kantonu.

**Član 17.** Vršiti se izmjena postojećeg člana 111. stav (1) i daje nova definicija pripravnika koja je primjerenija oblasti obrazovanja te se precizira trajanje pripravničkog staža.

**Član 18.** vrši se izmjena člana 112. kako bi se isti učinio jasnijim obzirom na poteškoće koje su se javile u primjeni te se briše nepotrebni tekst obzirom da je ranije izvršeno skraćivanje naziva Zakona o radu.

**Član 19.** ovom odredbom briše se postojeći član 125a. kako bi se tekst zakona uskladio s odredbama Zakona o osnovnom odgoju i obrazovanju a obzirom da je presudom Ustavnog suda Federacije Bosne i Hercegovine, broj: U-25/22 od 18.4.2023. godine utvrđeno da istovjetna odredba pomenutog zakona nije u skladu sa Ustavom Federacije Bosne i Hercegovine i predviđeno je njeno brisanje.

**Član 20.** vrši se izmjena člana 127. stav (2) na način da se u uslovima za imenovanje direktora škole poziva na novi član kojim se reguliše opći uslovi za zasnivanje radnog odnosa, koje mora ispunjavati i kandidat za direktora škole.

**Član 21.** vrši se dopuna člana 131a. stav (4) obzirom na činjenicu postojanja dugotrajnijih bolovanja direktora škola.

**Član 22.** ovom odredbom briše se postojeći član 135a. kako bi se tekst zakona uskladio s odredbama Zakona o osnovnom odgoju i obrazovanju a obzirom da je presudom Ustavnog suda Federacije Bosne i Hercegovine, broj: U-25/22 od 18.4.2023. godine utvrđeno da istovjetna odredba pomenutog zakona nije u skladu sa Ustavom Federacije Bosne i Hercegovine i predviđeno je njeno brisanje.

**Član 23.** vrši se izmjena člana 161. stav (3) kako bi se jasnije definisalo šta su vlastiti prihodi škole i predmetna materija uskladila sa propisima viših nivoa vlasti.

**Član 24.** vrši se izmjena člana 163. stav (2) na način da se jasnije definiše uloga nadležne inspekcije za obrazovanje po pitanju nadzora nad provođenjem zakona i propisa donesenih na osnovu zakona.

**Članovima 25. i 26.** vrše se izmjene kaznenih odredbi zakona i to povećanjem iznosa novčanih kazni za prekršaje te uvođenjem novih prekršaja koji proizilaze iz novih odredbi koje se dodaju u zakon.

**Član 27.** propisuje se rok za donošenje novih podzakonskih akata te nastavak primjene postojećih.

**Član 28.** definiše se moment stupanja na snagu ovog zakona.

#### **IV – FINANSIJSKA SREDSTVA**

Ni jedna od predloženih odredbi Zakona o izmjenama i dopunama Zakona o srednjem obrazovanju i odgoju, ne iziskuje dodatna finansijska sredstva u Budžetu Tuzlanskog kantona za 2024. godinu kao ni naredne budžetske godine što je definisano i obrascu IFP - NE.

#### **V – PRIJEDLOG**

Na osnovu izloženog predlažemo Skupštini Tuzlanskog kantona da po redovnom postuku shodno odredbama člana 124. Poslovnika Skupštine Tuzlanskog kantona uvrsti utvrđeni nacrt Zakona o izmjenama i dopunama Zakona o srednjem obrazovanju i odgoju, na prvu narednu sjednicu Skupštine Tuzlanskog kantona.

**OBRADIVAČ**  
**MINISTARSTVO OBRAZOVANJA I NAUKE**